



Inatsisartut suleriaasianni § 37 imm. 1 najoqqutaralugu Naalakkersuisunut imaattumik apeqquteqarpunga:

Naalakkersuisunut apeqqutit:

1. Naalakkersuisut paasissutissiissutigisinnaavaat Kalaallit Nunaanni inuussutissarsiornermut ingerlaqqiffiusunillu ilinniakkat qassit ullumikkut kalaallit oqaasii kisimi atorlugit naammassineqarsinnaanersut, tassa qallunaatut atuartitsineq, ilinniagassat, misilitsinnerit imaluunniit suliffimmi sungiusarnermut atatillugu uppersaartit atornerqanngikkaluarlutik?
2. Naalakkersuisut paasissutissiissutigisinnaavaat ilinniakkat sorliit kalaallisuinnaq oqaasilinnit naammassineqarsinnaanersut?
3. Naalakkersuisut paasissutissiissutigisinnaavaat ilinniakkat qassit piviusumik qallunaatut piginnaasaqarnissamik piunasaqarnersut, atuartitsineq, ilinniagassat, misilitsinnerit, suliffimmi sungiusarnermi ilitersuinerit imaluunniit allaffissornermi attaveqarneq tamakkiisumik ilaannakortumilluunniit qallunaatut ingerlanneqartarmata?
4. Naalakkersuisut suliniuteqarnissaminnik pilersaaruteqarpat ilinniakkat tamarmik oqaatsitigut piunasaqaataannik ataatsimut takussutissiamik suliaqarnissamut, taamaalillutik inuusuttut, inersimasut ilinniaqqilersulluunniit siumut takusinnaaniassamassuk ilinniakkat sorliit kalaallisuinnaq oqaasilinnut periarfissiissutaasut?
5. Ilinniakkat tamarmik oqaatsitigut piunasaqaataannik ataatsimut takussutissiamik suliaqartoqassappat taamatut suliaqarneq qanoq akeqassava? Inuiaqatigiinnut pisortanut namminersortunullu?
6. Ilinniakkat kalaallisuinnaq oqaasilinnit naammassineqarsinnaasut pillugit takussutissiamik suliaqartoqassappat taamatut suliaqarneq qanoq akeqassava? Inuiaqatigiinnut pisortanut namminersortunullu?

(Inatsisartunut ilaasortaq Jens NapātôK', Naleraq)



Tunngavilersuut:

Kalaallisut nunatsinni pisortatigoortumik oqaasiupput. Taamaattumik ersarilluinnartumik paasinartariaqarpoq ilinniakkat sorliit innuttaasunut kalaallisuinnaq oqaasilinnut piviusumik ammasuunersut.

Apeqqutaanngilaq ilinniarnermut isissutaasartut kisimik, aammali piviusumik ingerlatsineq: Ilinniagaq kalaallisut kisiat atorlugu ingerlanneqarsinnaava? Atuartitsineq malinnaaffigisisinnaava? Ilinniagassat atuarneqarsinnaappat? Misilitsinnerit kalaallisut ingerlanneqarsinnaappat? Suliffimmilu sungiusarneq kalaallisut naammassineqarsinnaava?

Tamanna naligiissitaanermut, ilinniartitaanermut, suliffeqarnermut kiisalu nunatta tamarmiusup ineriartortinneqarneranut pingaaruteqarluinnarpoq.

Apeqqutit ullut suliffigisat qulit (10) iluanni allakkatigut akineqarnissaat qinnutigineqarpoq.

Nutserinermut atatillugu nalornissuteqarnerit pisoqarneranni kalaallisut allataq tunngavigineqassaaq.